

壬癸志稿二

太倉錢寶琛伯瑜輯

同里

葉裕仁涵溪
季錫疇崧耘
趙兆熊耳山
畢庭杰雄伯

參校

人物

太倉州

列傳

宋

龔識字默甫其先邵武人父慎儀仕南唐禮部郎中拜
歙州刺史及南唐滅為廬絳所害識始徙居於吳登宋
端拱進士第吳郡士登第自識始以薦擢監察御史遷

壬癸志稿

列傳

一

殿中侍御史兼左巡使宋龔唐制御史不專言職至是
始擇有學術操履者俾入臺言事識首被選後以病目
累表乞退除檢校司封郎中平江軍節度副使

龔宗元字會之識子鄉貢首選天聖中擢進士主仁和
簿以父疾乞便侍養調吳縣改建安尉有能聲以薦章
保任者二十有二召見擢大理評事知句容縣擿發如
神楊紘持使節行部號深酷至境獨曰龔君已治吾往
徒為擾耳遂不入歷通判衢越二州官至都官員外郎
謝事家居於崑山黃姑里作中隱堂與程適陳之奇為
文酒之樂吳人謂之三老宗元初官仁和范仲淹深加

禮重稱其人文溫厚皆有正氣謂曰君既清立他日必爲令器慎勿因人以進故登朝未嘗游公卿門卒以方潔號慶厯人材有武邱居士遺藁十卷宗元初讀書虎邱山寺故以名集

龔程字信民宗元子平居尊古儀法家不設老佛像祭祀不焚紙錢讀書南峰攻苦食淡遂博極羣書鄉人號有脚書櫥熙甯六年進士厯西安丞終桐廬縣子况字濬之擢進士第文章學術與蘇過齊名號龔蘇因其先中隱堂自稱起隱子終祠部員外郎從子明之見孝友傳

王癸志稿

列傳

二

邴亶字正夫幼有識度第嘉祐二年進士初授睦州團練推官知於潛縣未赴熙甯初詔天下陳理財省費興利除害之策亶自廣東安撫司機宜文字爲書陳蘇州

水利

詳見水利

王安石善之六年授司農寺丞提舉兩浙水

利民不爲便遂罷歸治所居之西水田曰大泗灤者如所陳之說爲圩坵溝澮場圃仿井田制歲入甚厚因圖狀以獻且明前法可用復爲司農寺簿遷丞預修本寺制張寅志作敕式號完密除江東轉運判官元祐初入爲太府丞出知温州以比部郎中召未至卒年六十六贈司農卿祀鄉賢有吳門水利書四卷行於世子僑字子高

負才挺特亦爲王安石所器許後爲將仕郎嗣輯其父水利書有條緒鄉里推重謂之邾長官初宣有功三吳水利立專祠已廢其裔孫鼎仕明浙江右參議爲請於當事復之世以子孫一人奉祠事

胡百能字少明嶧子紹興進士知衢州江山縣有惠愛乾道初授諸王宮大小學教授方嚮用力請老授左奉議郎賜緋衣銀魚致仕歸築堂曰宜休

元

施文勝字文質高資廣學有識量時名士皆樂與交至大都謁太保馬劄兒台亟薦之朝拜集賢院學士奏對

王癸志稿

列傳

三

警敏命聘宗廟太祝王女遷利用監經歷隨復前職進階都水少監卒贈中奉大夫集賢院學士輕車都尉吳興郡侯

朱文德任太尉府長史丁父艱遂不仕扁其西齋曰可閒弟士英任濟甯府同知卽引退人兩高之

顧信字善夫德子性好儒雅工書嘗卽北郭祖墓旁建養壽蘭若請於朝賜額淮雲寺從趙孟頫游得其書必勒諸石構亭以覆顏之曰墨妙厯官杭州軍器局提舉

明

秦約字文仲至正間官崇德州教授洪武初應召試愼

獨箴授禮部侍郎以母老辭歸再徵詣京師疏陳書院書堂義學當依舊制修舉守令選不同常調請別立一科四十受職百日舉代郡邑三年上計與志書同進備國史徵采上悅以約年老難劇任命授五百里內儒官得溧陽教諭御史練則成待制吳沈薦約宿學遺老合在館閣不報任溧陽八年請老歸卒祀鄉賢

盧熊字公武父觀見隱逸傳熊少從楊維禎遊有學行精六書元季吳縣教授明洪武八年以秀才舉或曰以故官迫遣至京除工部照磨用能書授中書舍人出知兗州時太師李善長營魯王府又浚兗州河熊經度就王癸志稿

列傳

四

役會簿錄刑人家屬事坐死籍其家篋中惟餘麻桌帝深悔之熊嘗疏州印篆充譌類袞忤旨至是竟得罪子彭祖字長嬰洪武末薦授武康丞永樂初爲禮部主事坐事謫阜城爲民尋徵詢行在冠帶聽用以疾卒彭祖學不事文飾務適用有父風

陳潛夫字振祖初名潛以字行本錢塘人移居太倉性端雅善開引後進洪武六年爲邑訓導陞國子監學正卒祀鄉賢

張洪字宗海居沙溪本姓侯生五日母亡父客死鞠於張氏十歲能書詩旣壯以鄰家事連坐戍雲南黔甯王

一見器重會木邦刁干孟逐其主思倫法詔三司議撫
勦洪言倫法擁三十六甸之眾有輕中國心今上下亂
宜討木邦示威分建其國使勢殺朝廷以爲然遂捕斬
刁干孟立其子爲宣慰仍納倫法於麓川亡何以明經
被徵授靖江王府教授稱病免永樂初授行人尋出使
日本還再使吐蕃修茶馬舊政時緬甸宣慰那羅塔殺
孟養宣慰刁木旦據其地洪奉詔責還孟養地那羅塔
倨不服洪責其大不敬并擅殺宣慰罪那羅塔氣懾謀
置毒洪覺之趣具牲牢遲數日烹從行七十人得俱免
凡六往返遂與其使陶孟洛霞復命會交趾未定事旋

壬癸志稿

列傳

五

寢以薦入文淵閣修永樂大典充副總裁官陞行人司
右司副洪熙元年進翰林院修撰贈其養父如其官宣
德初預修太宗仁宗兩朝實錄五年乞致仕賜白金綵
段詔改儒籍旣歸杜門著書卒年八十四

張采按常熟
鄧志載洪沙

溪人管志載洪父贅沙溪郁氏父
母亡撫於鄰張炯則爲婁人明甚

吳凱字相虞父公式早亡遺腹生凱幼時里胥召之役
乃詢縣陳有母難遠離願畢學知縣芮翀許之旣以諸
生善書預修永樂大典書成賜金幣歸膺貢入太學永
樂十八年中順天鄉試宣德中授刑部主事獄上盜二
一弊一旦病所連六人凱恐并死無從質乃謹療病盜

後得眞釋所連者改禮部主客司以母老乞歸家居四十年非公不至官府屢薦不起以老壽卒里人私謚貞孝先生葉文莊盛重之常曰鄉里作官前輩當法吳丈後輩當法蘊章謂崑山孫瓊也子愈有傳

陳濟字伯載弟洽字叔遠其先有可山者由浙江樂清避亂平江樂雙鳳土風遂家焉濟入籍武進讀書過目成誦嘗以父命如錢塘家人齎貨以從比還以其貲之半市書口誦手鈔十餘年盡通經史百家之言永樂初詔修大典用薦以布衣召充總裁繙秘庫書數百萬卷發凡起例區分鉤考人有所疑問應口辨析書成授右

王癸志稿

列傳

六

贊善性謹慎皇太子禮重之五皇孫皆從授經濟懼盛滿彌自謙抑所居蓬戶葦壁蔽風雨而已爲文根據經史不事葩藻居職十五年而卒年六十二洽好古力學與兄並有名洪武中以善書薦授兵科給事中嘗奉命閱軍一過輒識之有再至充冒者輒叱去父戍五開歿洽奔喪會蠻叛道梗冒險間行負父骨以歸建文中以薦起文選郎中永樂初擢吏部右侍郎改大理卿安南兵起命洽赴廣西遂贊軍務主饋餉安南平轉吏部左侍郎還朝兼署禮部工部事七年復參張輔軍討簡定平之還從帝北征練兵塞外九年復與輔往討陳季擴

居五年進兵部尚書留贊李彬軍事仁宗召黃福還以洽掌布按二司中官馬騏貪暴反者四起而榮昌伯陳智都督方政不相能寇勢日張洽上疏言之宣宗降敕切責智等命成山侯王通往討洽仍贊其軍進師應平次甯橋洽言地險惡恐有伏宜駐師覘賊通不聽麾兵徑渡陷泥淖中伏發官兵大敗洽躍馬入賊陣創甚墜馬左右欲扶還洽張目叱曰吾爲國大臣食祿四十年報國在今日義不苟生遂自剄死事聞贈少保諡節愍官其子樞刑科給事中

夏景字仲昭父亮少孤鞠於母黨朱氏遂冒其姓

本廬陵陳

王癸志稿

列傳

七

循所撰夏亮墓表

景少爲諸生御史范敬先行學口占詩句試

之應聲而答縣令芮翀待以賓禮嘗受春秋於訓導盧從龍從龍因太守姚善事坐死諸生皆遜景獨不去永樂十三年成進士改翰林院庶吉士始更姓夏以善書召見令備顧問又直東宮贊機密授中書舍人直文淵閣初名昶太宗易爲景命書諸宮殿榜賜第宅免朝參進考功生事仍典文翰正統中出知瑞州景泰三年入爲太常少卿英宗復辟進正卿年七十致仕又十三年卒於家賜祭葬景爲人篤倫誼風流文雅有高人致爲政不事名譽人安其平詩辭清麗寫墨竹擅絕一時朝

鮮日本諸國爭購爲重兄昺字孟暘亦善書爲永甯縣丞坐事戍隆慶昺旣被遇太宗一日問書所傳以兄昺對卽命馳驛入見試書稱旨授中書舍人昺居翰林三十餘年次子文振復在中書世以爲榮而吳中稱孝友必曰夏太卿家

徐牧字養正其先台州人曾祖伯興爲崑山州學正因家焉父壽字大同讀書善醫長於鍼灸有孝稱牧繇宣德十年舉人任青田訓導轉嘉善教諭分典省試凡三陞岷府紀善進長史致仕行止有法爲時所重

張汝昌字仲光正統六年舉人爲大名府同知考滿待

壬癸志稿

列傳

八

選卒於京汝昌能詩書法倣宋克爲人慎密有尤之者常自責因號求己生作歌見志居官廉子孫衣食不給陸昺字孟昭常熟籍諸生景泰二年進士厯官刑部郎中決獄明恕能以文學飭法嘗慮囚畿內活擬死者九人復被命按事河南山西還奏稱旨尋出爲福建參政巡視海道先是有通夷商船掠殺人昺至迹所在得之並及其黨漳泉二郡水齧城築隄免海患未幾被讒歸平居不謀生產所至必飾齋居時花竹客過觴詠張燈合樂皆咄嗟具爲郎時卽京邸築清風館罷歸作賜閒堂其得公卿間聲譽及受謗皆以此然昺性實長厚見

一丐者爲童時友執手延坐畱數日爲買居計生殖在刑部錄囚見重囚囊三木爲鼠所嚙憫之買數貓置獄中遂爲例卒葬丹霞塢祀鄉賢從孫瑚嘉靖元年舉人由玉山知縣陞南京御史力持風節忤嚴嵩意出爲思南知府

高宗本字茂卿景泰五年進士爲監察御史巡按河南豪右斂跡清軍四川擿發姦慝洗白冤者及按湖廣城步縣劇賊爲亂宗本爲監軍勦捕民得不擾後又奉敕整飭甯夏等處軍務劾征虜前將軍李杲行師不律杲竟坐免出爲河南副使訟獄多平反以病解職卜居揚

王癸志稿

列傳

九

之江都自號江淮逸叟

顧以山字安道沙溪唐橋人初爲吏員負志讀書因入京給事舉順天鄉試天順元年成進士除監察御史九江盜起都御史高明用以山謀不旬月擒其渠厯官河南副使鈞州盜起劫官帑同官所讞失實獄成以山察非辜姑緩之卒獲眞盜平反二十八家終陝西參政所至稱廉能及歸隱於鄉貧不給志行彌厲

張泰字亨甫本姓姚曾祖瑞代晉陵張某戍太倉衛遂冒其姓泰生而秀穎天順七年會試中式明年廷試改翰林院庶吉士授檢討進修撰爲人坦易有風度衣纓

蕭散怡靜寡言然嫉惡甚酒酣岸幘輒憤烈劉文安定之深服其文詩學李杜雄健俊逸唐元薦云成宏間藝苑則以李懷麓張滄洲爲赤幟滄洲泰詩集名也少與陸鈇陸容號婁東三鳳卒祀鄉賢

陸鈇字鼎儀父晟育於吳隨其姓後復今姓天順七年會試第一明年廷試第二授翰林編修預修英宗實錄書成遷修撰孝宗在東宮鈇侍講讀敷納詳懇禮度莊飭憲宗每矚目稱善進太常少卿兼翰林侍讀充經筵日講官孝宗卽位賜白金文綺因病乞歸卒於家詔賜葬祭官其子鈇清潔有志操寡交與學問淹雅每國家

壬癸志稿

列傳

十

有故憂形於色病亟以東宮舊人猶具遺草言事不及上中外惜之祀鄉賢子爰字子引宏治十二年以卹蔭授中書書法端勁嘗奉詔使江南册封襄王府餽贈一無所受正德三年以忤劉瑾歸瑾誅李東陽薦復舊職擢禮部儀制主事踰年病卒爰負才喜聲詩與毛澄陸伸等齊名號七友

陸容字文量先冒徐姓諸生時爲葉文莊盛器識每以范文正行業期之成化二年舉進士除兵部職方主事嘗奉使籍畿內河南山東諸郡縣官馬還條馬政切於民患者四事累陞郎中時邊報急封事日或三四上所

下部議多出容手安南與占城鬩議發兵討之西番進獅子奏請大臣往逆容俱力論得寢指揮昌佐傳陞金齒騰衝參將力爭不與錦衣百戶韋瑛掩捕平民告變容請詔法司鞫之瑛坐誅先是捕妖言者受世爵民多誣死容疏除其例母喪服闋赴京言太倉兵衛八事採其尤切者通行天下仍除武選郎中太監李良舉都指揮王欽梁宏爲都督僉事命已下容謂都督位重不宜任無功況於非人李良市恩專擅當正刑典疏再上卒奪所授既復極論天下事曰儲養台輔教導勳戚愛惜人才久任巡撫經理京衛選練禁兵均平鈔法慎重會

王癸志稿

列傳

十一

議有人所不敢言者出爲浙江布政司右參政益練核庶事徧歷郡縣問民所苦斥淫祀陳浙中急務十事又疏論漕渠利病積與寮長忤會大計誣以失察吏昧罷歸踰年卒祀鄉賢容性至孝母卒當嚴寒容且老猶徒跣擗踊勺飲不入口者三日其居喪三年不入內未嘗見齒一弟早死撫孤過已生容沒諸孤持三年服治家嚴肅燕居冠服維謹每食子弟立侍命乃坐平生嗜書籍多著述子伸有傳

丁輓字用行天順三年舉人授武定州學正時武定學者多弗循矩輓率以身教成就甚衆九年陞南京國子

監助教爲祭酒王嶼所重轉監丞時祭酒陞代或以故去輓權國子事六館諸生多愛敬之卒於官

姜昂字恆頰成化八年進士知棗強縣爲治清簡門不立呵卒獄無滯囚盜賊亦解散三年以報最赴召路遇盜盜魁見縣封叱其偵事者曰我知棗強清官豈有長物奈何犯之環拜去至都授監察御史時方士李孜省貴幸昂露章列其姦杖午門外尋以親老請改南京出知河南府歲旱昂至雨亦至人稱姜公雨又劾縣之不飭者諸屬慄慄奉職河南大治藩府人犯法立決遣王有言謝無及而已公暇閉戶讀書復以母老乞近郡凡

王癸志稿

列傳

十二

三請得調甯波覈吏治如河南削鄞縣供億費歲省萬金日本使臣道出四明橫甚及境皆斂手市舶中貴怙勢昂裁以禮亦愧服在任踰年作無事亭以見志進福建布政司左參政不赴請終養母服闋以疾卒於家祀鄉賢昂在官日市肉供母而自食菜茹子弟學書不聽用官紙筆家居室不蔽風雨非歲朝未嘗燕客饗飧時乏則磨麥作糜充食鄉人呼爲姜麥粥焉

吳愈字惟謙凱子成化十一年進士授南京刑部主事歷員外郎中出知敘州府慶符盜劫縣治令誣執二十七人抵死愈疑之詣縣辨審惟二人眞盜乃縱釋二十

五人後果獲餘盜土官安鼇以馬湖叛與敘比壤臺司徵大兵會敘鼇棄城走眾慮其糾諸夷爲亂愈曰彼負嶠抗拒勝負未可知旣離巢穴一窮虜耳諸夷皆其仇又何能爲因遣人襲執之自是馬湖改置流官後其黨復劫府印爲亂愈親抵其巢諭之遂解散擢河南右參政致仕歸生平喜賓客得後進心居林下二十五年卒年八十四

王倬字用檢夢聲七世孫成化十四年進士授山陰知縣以憂去補餘千屢決疑獄會贛州賊殺永豐令檄倬往剿賊據山險播石雨下莫敢進倬夜縱羊千頭行山

壬癸志稿

列傳

十三

下從鼓噪賊亂投木石比曉殆盡亟進兵遂平其地改蘭谿因積逋繫者盈獄倬至釋所繫凡赦前者與蠲除餘爲期以次輸足胥吏皆斂跡擢南京山西道監察御史劾選郎貢欽貪污及太監楊某恣縱罷之時邊警詔以平江伯陳銳充總兵官倬言銳非統御才必僨事已果無功出爲貴州兵備副使旋改廣東瓊州兵備時生黎爲梗崖州千家村尤橫倬聲言發兵屢移師期乘賊怠襲破之散其巢三大村勢遂弱奏建守禦千戶所進雲南按察使又進廣西右布政使會破臨賀砦餘賊匿山谷眾欲乘勢殲之倬不可諭其長悉降改四川左布

政使時大盜藍鄙逼成都眾議焚四郭民居倬曰是張之也開城門嚴兵以待之賊不敢近總督彭令具馬二萬緩且從軍法州縣猝不可當倬匿總督檄令各鄉馬俱入城避賊不數日馬足彭又需熟糧四千石期以明日日中倬督市戶分道抵軍遂無誤尋拜右副都御史整飭薊州邊備兼巡撫順天等處屬邑大饑請通州倉米十萬賑之又恐轉輸遲許在邊官軍預支兩月糧俸益以儆直移官軍所在糧俸散飢民全活萬計總兵太監合兵屯馬蘭峪以禦邊倬策曰敵知我屯西必東入擣我虛令指揮葉鳳覆兵山下敵果毀東牆入伏發斬

王癸志稿

列傳

十四

獲無算進南京兵部右侍郎旋以七十請老三上疏給驛還里仍飭有司存問歸創家廟又割田千畝仿范氏義莊以瞻族人卒年七十五祀鄉賢子忬有傳

陳愷字企元成化二十年進士授兵部武選主事歷郎中前後十四年不離武選一意奉公斷絕私謁時議武臣世襲徒坐耗廩祿凡旁支及犯姦盜不得襲愷謂法太過白於尚書馬文升凡同宗出自立功者授職作姦褫職者本支則坐有武官子未及襲犯強盜死其弟幼於例犯強盜者子孫不得襲愷以爲兄爲盜且未授官弟固非爲盜者子孫宜視父職降一級文升韙其議奏

爲令會詔大臣各舉其屬文升遂薦愷材可備方岳之任會暴疾卒

郁容字宏德居沙溪成化二十年進士除刑部廣東司主事精於法律都御史秦紘與安遠侯柳溥訟久不決容讞之直紘後容至南都紘已爲戶部尙書避不往見陞員外郎忤內侍調通判撫州遷知澧州陞雲南按察司僉事分巡安普道所部產金金戶銷礦率有例入容禁絕之劇盜阿則爲亂容以計散其黨遂成擒民夷讐服奔母喪歸卒子勳字元績宏治九年進士授湖廣華容知縣居官持正時劉大夏居東山善勳有東山倡和

壬癸志稿

列傳

十五

集卒於官

顏箴字克和成化元年舉人授梁山教諭歷陞國子監助教南京翰林院檢討仍管南監助教事致仕箴事親孝待叔季友愛教學不專於文造次皆有法度在國子時祭酒邱濬稱爲敦篤爲己之士初從學於陸容箴長五歲執弟子禮容歿箴爲撰年譜焉

張敬字直夫幼端重從張泰游成化十年舉人授蠡縣教授蠡俗陋無鄉舉敬教其子弟遂多發解者歷重慶教授國子博士與修憲孝兩朝實錄遷趙王府長史輔導醕謹王遇之厚居數歲以疾卒官

馮琨字君美鉞子成化二十二年舉人授永康教諭遷知薊州薊州民以牧馬爲業每戶承馬若干匹給草場若干畝而勳戚貴璫有盡攘其地爲姦利者琨至按籍覈之盡還本戶馬用蓄息被譖逮詔獄琨列主名幾何影占幾何分別以上孝宗是之詔復職武宗卽位前憾者附劉瑾再起詔獄被杖械街彈所薊州之民皆提盜挈壺餉琨有僧故昵於瑾私語曰馮公第飲薊州一杯水非民見餉卽園土死耳瑾愕然復還薊州尋遷杭州同知再遷兩浙運副擢登州知府清操彌勵屬有高第者簞簋不飭劾免之東土肅清後罷歸林居二十年足

王癸志稿

列傳

十六

跡不入公門

胡承字安節父母早歿育於兄沓成化二十三年成進士明年宏治改元簡進士分傳諸親王除翰林檢討充益王府講官尋陞左長史承負文學持正不阿在府隨事規諫事無大小聽承參決時護衛軍多倚勢橫懲其尤眾遂輯又民苦遠汲捐私錢甃城中數井北境山路困行旅爲平治崎嶇亘二十里民咸德之以疾請老王勉畱竟卒於官

王秩字循伯元崑山知州安貞後家於崑山成化二十三年進士授永康知縣永康賦稅多不平秩履畝計實

民大悅服入爲南京兵部主事歷刑部員外郎遷廣東按察司僉事懷戢廣西蠻寇大璫劉瑾責賄不應巡按御史某瑾黨也侵秩秩卒不屈陞江西兵備副使遷按察使擢右布政姚源大盜起秩冒矢石斬馘無算亦多所降撫甯王宸濠器重秩欲媾姻秩遜謝之謂其子曰是人滿而好兵必爲亂不出十年矣後果如其言擢雲南布政乞養歸卒

朱稷字相之居塗菘有才幹子弟多從學舉子業宏治三年成進士爲工部主事權蕪湖稅中途嬰疾之官勞心剔蠹疾劇卒有司經紀成殮人傳其清德

王癸志稿

列傳

十七

毛澄字憲清宏治六年進士廷試第一授脩撰預脩會典成進右諭德直講東宮敷奏明暢孝宗聞之甚喜徹御前中秋宴以賜進左庶子兼翰林侍讀武宗朝進侍講學士再進學士歷吏部右侍郎十二年五月進禮部尙書其後帝常微行又出居庸幸宣府久畱不返澄頻疏諫悉不報明年帝自稱威武大將軍朱壽統六師巡邊澄復偕廷臣上疏諫十四年二月帝將南巡澄等復偕廷臣上言因歷陳五不可亦不報時倖臣錢甯恣脅六卿澄無所屈甯銜之使人伺澄門累月不得間甯反重之宸濠請得撫按以下朝服見又居母喪挾鎮巡官

表孝行乞旌澄皆執不行濠既反就擒帝駐蹕通州將
卽賜濠死澄據漢庶人故事請還京告郊廟獻俘行戮
不從武宗崩迎世宗於安陸邸既至將謁或議用見天
子禮澄曰今如此後何以加豈勸進辭讓之禮當遂廢
乎世宗踐阼議興獻王主祀及尊稱澄據宋儒程頤議
前後錄上謂宜改稱興獻王爲皇叔父興獻大王妃爲
皇叔母興獻王妃以益王第二子崇仁王厚炫繼興王
後主祀事疏凡五上皆畱中而張璉復希旨進大禮或
問帝益嚮之至九月末下澄等前疏更令博採輿論以
聞乃卒加稱興獻王爲興獻帝妃爲興國太后十二月
壬癸志稿

復傳諭加稱皇帝內閣楊廷和等封還御批澄抗疏力
爭又偕九卿喬宇等合諫嘉靖元年正月會甯清宮災
事獲止然帝意益堅嘗遣中官諭意出囊金畀澄且曰
必祈公易議也澄駭愕急止之奮然曰老臣悖耄不能
隳典禮獨有一去不與議已耳抗疏引疾至三四上帝
輒慰畱不允二年二月復力請乃許行至興濟卒先是
吏部尙書闕廷推屬澄澄固辭又論定策功加澄太子
太傅蔭子錦衣衛世襲指揮同知五辭不允卒不受其
卒也帝深悼惜之贈少傳諡文簡祀鄉賢

馬慶字善徵宏治六年進士除行人三使宗藩餽遺皆

不受甯藩陰蓄不臣傳令東翼門入慶正色斥之入從中道授南京山東道御史率同官劾遼東鎮守定西侯蔣驥巡撫都御史陳瑤不飭邊備擢江西僉事山洞賊劇慶身督士卒克之會事中格不得志乞歸治園結社託於酒以老

周廣字充之少英邁方御史行學奇之下令諸生從廣游有司月致餼宏治十八年成進士歷知莆田吉水二縣贛州流賊焚永豐剽至吉廣率眾力禦城以完正德中擢浙江道御史疏陳四事一喇嘛僧蠱上爲淫奢宜投四裔以禦魑魅一上母得狎伶工如臧賢輩至引同

壬癸志稿

列傳

十九

光故事爲戒一錢甯故宦官奴乃冒國姓稱皇子使天下惴惴有國本慮一統兵大臣如陳金陸完輩優游玩寇請定期責令成功以贖前罪疏入甯怒幸帝不深罪謫廣東懷遠驛丞甯遣邏卒遮刺廣變姓名被道人服潛行四百餘里乃免廣帥武定侯郭勛遺金不受銜之攝致軍門箠幾死九年遷建昌知縣有惠政越二年吏部除廣貴州按察司僉事名上甯識之假以他事矯旨再謫竹寨驛丞世宗卽位復御史遷江西副使改提學時璽書褒寵殊等天下十三人廣與焉四年擢福建按察使尋以右僉都御史巡撫江西墨吏望風去將限豪

右田不果以例裁革巡撫改南京刑部右侍郎條列部中利弊五事施行之卒於官嘉靖末贈右都御史廣性嚴冷居官公彊弗受請託人多敬憚之

周在字承德父勉見義行傳在早孤力學遵父遺言置田八百畝給族之貧無養孤無教者又立義塾建綏成祠祀始遷祖而以族人無後者祔焉由宏治五年舉人授廣西養利知州未赴後遷崑山卒在言貌有古人風尤善楷書整勁類其爲人子復俊嘉靖十一年進士官至太僕寺卿

陸伸字安甫容子宏治五年領鄉薦父喪服闋學正以

壬癸志稿

列傳

二十

禮賀伸爲書辭之曰人子免喪從吉束於禮與制爾至於終天之痛雖沒身詎能忘也若從吉而賀則禮無其文人情莫苦於早孤吾哀而矜之可也以爲善而賀之烏見其可乎又嘗作冠禮答問二子更名記其動依古法類此知州棗陽李端請修州志伸謝曰志者一方文獻史稱虞世南預修書虞荔虞寄得佳傳至今訾之先子州人予何以執筆因固辭伸縱覽羣籍日以修學著書爲事自先世積書數萬卷每書必疏其略於下方間有考證亦隨筆之正德三年登進士尋有匿名奏草指斥劉瑾瑾傳旨窮治伸竟卒於獄士類哀之嘉靖初追

贈評事

姜龍字夢賓昂子正德三年進士歷官禮部儀制司郎中時甯王宸濠蓄不軌以三事請一曰益護衛兵二曰撫按等官不得行出使禮三曰乞於浙江遴選宮嬪龍白尚書寢其議正德十四年武宗將南巡率同官諫止罰跪五日杖幾死黜爲建甯府同知多惠政尋遷雲南按察司副使備兵瀾滄姚安等處滇土司故盜藪龍讓其酋曰爾爲世官而縱盜受賂乎酋懼請自效又單騎至夷箐撫諭之羣盜泣聽命有巨盜方定旣降而貧妻妾交諍之定不忍負龍遂飲藥死南安州盜聚千人御

壬癸志稿

列傳

二十一

史且徵兵龍以一檄先之三日盜散略盡四川鹽井刺馬仁雲南麗江和哥仲二酋讐殺數十年龍設法撫諭皆願罷兵大候州土官猛國恃險肆暴龍擒之鄧川州舊多水患屯田皆廢龍指示方略築隄捍禦水不能災凡山川襲南詔時嶽瀆號悉革正在滇四年番漢大和鄧川立三正人祠祀袁州郭紳莆田林俊其一則龍也嘉靖五年春罷歸滇民間之哭聲載道家居二十年從容詩酒而沒龍博覽書史及星厯醫卜天文地理下至稗官小說莫不通曉祀鄉賢

吳鸞字應祥正德六年會試中式九年廷試授禮部精

膳司主事以疾乞改南陞主客司郎中鸞早慧從王倬
受易倬獨愛重鸞鸞既精於易義從受業成進士者甚
眾性恬退當試輒逡巡或中道反兄鳳強偕往卽取上
第輒又歸久之入都則同年桂萼已爲禮部尙書下階
握手曰安所得吳公公雖倦勉爲我縻一官然竟移告
畱省時同年鄒守益爲南京翰林掌院爲陽明學鸞與
上下惕然起曰武公九十而箴予曷云老因疾乞歸卒
年六十四祀鄉賢鸞事繼母孝田產悉讓兄弟茅屋數
椽單居屢空而終日欣欣若有所得部使者有司往請
輒不應徒步從一童子或時手袍帶行遇賤豎維謹州

王癸志稿

列傳

二十一

例給廉騶顧見卻謝其爲長者類如此

唐符字信伯韶子正德九年進士授行人繼爲御史出
按湖湘不務煩擾上下安之嘉靖六年復按湖湘吏民
稱眞御史補四川按察司副使勤慎敏達調河南督水
利十四年遷山西布政司右參政督理糧餉以勤卒於
官

王經字倫敘本姓吳正德九年進士除河南道御史年
少列風紀志在樹立居三月以忤逆璫劉瑾死杖下
周在字善卿坤從弟正德九年進士授寶坻知縣忤中
貴逮捕慷慨置對吏不能難還職縣人薛鳳鳴以御史

附劉瑾犯罪在繩以法因誣在人命復逮入詔獄杖瀕
殆法司直其誣十四年召爲監察御史詔覈湖廣貴州
各省錢糧時中官郭用勢侵守臣錦衣千戶聶能遷倖
進在並劾罷之又奏清平伯吳傑充湖廣總兵官貪懦
乖人望兵部侍郎馮清貪穢大學士楊一清在邊未久
不宜輒易禮部尚書席書謂在與費宏交結在劾書排
斥臺諫肆欺罔最後言王瓊險狠不可用禮部侍郎桂
萼薦舉失實復下獄杖尋還舊職會廷臣會薦致仕都
御史姚鏌等十人牽連忤旨萼又修舊隙謫吉安府推
官稍遷泉州府同知改眞定陞刑部員外郎中出爲湖

王癸志稿

列傳

二十三

廣僉事擢副使備兵衡州尋遷浙江右參政罷歸在平
生執法無少徇旣罷屏跡雙鳳故居不入城市卽故交
悉杜絕居二年卒祀鄉賢弟士字厚卿嘉靖二十年進
士授工部主事分司濟甯閘苦安居馬常南旺五百里
諸河泛溢身先徒役冒風雨沈土塞口不日奏績終以
忤權貴落職歸卒

顧濟宇舟卿正德十二年進士授行人擢刑科給事中
武宗自南都還臥病豹房惟江彬等侍濟言陛下孤寄
於外兩宮隔絕骨肉日疏所恃以爲安者果何人哉願
陛下慎擇廷臣更番入直起居動息咸使與聞一切淫

巧戲劇傷生敗德之事悉行屏絕則保養有道聖躬自安不報再踰月而帝崩世宗卽位濟上八疏其略言立法非難守法爲難聽諫非難樂諫爲難今新政所釐多不便於姦豪權倖持法不固則此輩將叢聚而壞之此守法之難也陛下首闢言路臣工靡不因事納忠高遠似迂闊切直或犯顏若怒其犯顏則言必忤置爲迂闊則計必沮此樂諫之難也陛下剪除羣凶天下稱明然姦黨尙存陰謀變幻未敗思固寵旣敗幸復全治亂安危不可不畏尋復言內臣張雄張銳等望誤先帝業已逮治又獲寬假願斷以大義俾無所售姦帝頗嘉納後

王癸志稿

列傳

二十四

乞養歸徙居崑山之千墩濟與族兄溱並任南北勢顯重濟尤篤士行有長者風卒僅四十餘子章志有傳張寅字仲明少讀書與兄辰互爲師友正德十五年會試中式武宗南巡明年始廷試授江西高安知縣憂歸起補宜春屬大水上臺司請捐歲租慮期會緩乃自具疏得請民不見災調太和邑苦徭役寅廣詢得平著爲令羅文莊欽順作平政敘勒石召爲南京河南道御史時議分祀南北郊社寅上言周正建子以十一月爲歲首故冬至之郊先於夏至之社今建寅勢必社先於郊是尊地卑天從舊便不見省侍郎黃綰以議禮驟貴寅

疏列其十罪時張璉暫失帝指勒歸隱示且復用璉晝夜南馳十七日抵錢塘役夫顛踣寅劾璉悻悻無人臣禮并及都御史汪鋹謫高唐州判官州守別築室居寅引弟子講學期年移知安州安多水患寅浚牙家港築隄禦漫溢比壤祁州知州孔天允亦以材見重臺司時人語曰有所疑問安祁莫憂悚有張孔寅浮沈四五載會張璉汪鋹死入爲南京文選司郎中與尚書湛文簡若水他曹郎鄒文莊守益周簡肅延相議論學益精冊立皇太子博選宮僚夏言等所登進多私人帝屬吏部更選許文簡讚爲尚書知寅舉十二人寅預焉遂改右

王癸志稿

列傳

二十五

春坊右司直兼翰林檢討仍以五品服俸共職言滋不懌而翰林故事六品下次科第序坐寅成進士十九年同列多後進執授官歲凌寅寅不屈上書執政臺省有所右摭他事劾罷歸自是中外薦寅皆不報又十九年卒年六十四

王積字子崇少純篤嗜古冬擁被讀書夏納足木罌中不少輟正德十五年會試中式明年廷試得兵部以便養乞南任武庫時上供馬快船累及衛較士供役輒破家積一切釐革官出公羨辦累頓息遷廣東參議治糧儲考利弊十二事佐當事殄恩平寇虜獲千計功上賜

金綺旋以憂歸及補官恥謁要人候歲餘不得調乃上書乞休吏部愧除陝西參議陝多宗屬恣橫不如意立詬呼感積威惠遂相戒毋囂遷湖廣參政時苦苗叛積計苗屯糯糖山最堅令輕兵綴屯別從間道傾餘巢屯孤自破巡撫如其計平苗以監試貴州時累謫兩浙鹽運司副使亦用前功賜金厯遷福建參政佐巡撫破倭復賜金積雖外吏受世宗知題御屏云慣打遠差不要錢王積晉副都御史巡撫山東持大體吏民懷畏遷南京兵部右侍郎未幾以目眚乞休歸居家十七載日擁書命侍人朗誦稍訛輒正之三佐藩而三以戰功賞然

王癸志稿

列傳

二十六

絕口不言兵事常從魏恭簡校鄒文莊守益呂文簡柵講學甚析年七十八卒祀鄉賢

瞿祥字治徵居蕩茜涇里正德十五年會試中式明年廷試授南京廣西道御史言應天府尹宜久任數易則吏得爲姦詔許之世宗卽位大蠲天下田租凡已徵者准除明歲所應輸不果民失望值江淮間連被水旱祥疏乞施實惠以弭災變乃賜行凡奏必切大體世宗稱眞御史未幾疾卒

王世芳字濟美正德十五年會試中式明年廷試授刑部江西司主事時婦翁毛澄官禮部尙書世芳避嫌乞

改南得禮部儀制司未幾遷兵部職方員外歷武選驗封郎中嘉靖七年擢贛州知府以清簡稱詹事南海霍韜貴用事道經贛世芳無加禮韜心善之語太宰遷其省按察副使提督學政世芳公廉不發私書多所汰黜會改先師像殺祀禮世芳遲不下被諭調江西遂歸後復官竟不起卒年六十一

蔡子舉字直夫嘉靖五年進士授刑部主事累官南京太常寺卿擢通政使報至三日暴卒舟中年四十有一子舉在官二十年博通傳記明習法令性寬易好稱人能父芝以進士仕至按察副使性剛介遇子舉嚴甚子

王癸志稿

列傳

二十七

舉盡孝養待其弟子齊亦友愛自其曾祖寓京師遂畱籍順天府子舉獨思還太倉故遇鄉人尤篤尋求得先壟將營宮室置田宅迎芝奉侍不遂卒

曹達字履中父早亡母朱守節有傳達中嘉靖八年進士累遷御史糾汪鋹不法杖五十謫外亦絀鋹以解達受杖已兩緹騎囊過鋹第忽挺起戟手詈曰若尙能脅肩入長安門否徐步歸邸待命得隨州判官州屬暴水達立賞格扞禦全活無算攝蘄水縣事中人從章聖梓宮過急責供帳達飭吏民手板水次己公服前引舟常廩外不庀一錢中人問知日是故強項曹耶引去先是

錦衣衛有林甲者遊權貴間賊敗逵按之其黨翟乙營救併責於法京師目懾號強項曹故中人云旣遷南城令多政績進南京工部主事三年遷廣州知府順德丞趙某夜行金叱退之覲歸丞在吏議逵治如法御史楊某故與丞有連欲有所縱舍逵持益力御史恚且以色加逵逵曰趙丞善行金固宜舍拂衣而出御史因誣以他罪詔就訊逵上疏自白遂調雲南知府而御史及丞相繼罷謫公論快之逵守雲南如治廣時以最聞擢按察副使備兵臨安夷酋普憲阻兵逵以所部深入縛之巡撫害其功格不上又當調遂歸少貧爲諸生日一粥

壬癸志稿

列傳

二十八

及貴而老非客至不三簋年七十卒祀鄉賢

陳如綸字德宣本姓許嘉靖十一年進士授侯官知縣爲政先教化持大體擿姦發伏一縣稱神以卓異擢刑部主事有關民上變告昭聖太后支屬事連宮闈世宗意不測如綸獨以大義開陳卒得俞旨邊帥以失亡多逮問武定侯郭勛庇之如綸召鞫立具獄論如法按察江西始至卽論釋戍邊者三十人錦衣使者奉詔醮龍虎山所過橫索如綸裁以禮法畢事肅然父喪歸再補江西擢福建參議會有兵事以勞瘁致疾乞歸卒於家如綸性孝友工詩文讀書至忠義事輒慷慨思效嘗被

疾宿三忠寺困甚不能執筆猶口占長歌見志曰三懷
詩文徵明書之刻石以傳

顧存仁字伯剛父啓明性淳篤好施以孝弟稱存仁中
嘉靖十一年進士除餘姚知縣徵爲禮科給事中時災
異求直言存仁見在廷吏務深文取容上疏請推曠蕩
恩赦議禮戍竄諸臣兼指斥朝貴辭連道士葉凝秀時
帝方修元法以爲刺己廷杖六十謫佃保安州往來塞
上凡三十三年穆宗卽位召爲南京通政參議歷太僕
卿因請重太僕丞選及論馬政弊報可聘歸有光修寺
志書成乞歸存仁困阨久方見用遽勇退世尤高之萬

壬癸志稿

列傳

二十九

歷初卒予祭葬

王忬字民應倬子嘉靖二十年進士授行人遷御史皇
太子出閣疏以武宗居青宮爲戒又劾罷東廠太監宋
興出視河東鹽政以疾歸起按湖廣復按順天二十九
年俺答犯古北口忬奏言潮河川有徑道一日夜可達
通州因疾馳至通爲守禦計盡徙舟楫之在東岸者夜
半寇果大至不得渡遂壁於河東帝廉知狀大喜擢右
僉都御史駐通治軍餉及寇退忬請賑難民築京師外
郭修通州城築張家灣大小二堡置沿河敵臺皆報可
尋召還三十一年出撫山東甫三月以倭寇亟命忬巡

視浙閩賊首汪直糾島倭及漳泉盜連巨艦百餘蔽海至忬嚴令將士燬其船五十餘艘尋改巡撫忬方視師閩中賊復大至犯浙江御史趙炳然劾之帝特宥忬時大同師覆巡撫坐失律下獄帝特進忬右副都御史巡撫大同防秋事竣加兵部右侍郎薊遼總督進右都御史忬言騎兵利平地步兵利險阻今薊鎮畫地守請去他郡防秋馬兵八千易之以步歲省銀五萬六千餘兩從之會所部兵屢失事降忬兵部侍郎時嚴嵩與兵部計防守之宜俱稱旨與忬議不合帝乃下詔責忬實主兵減客兵於是練兵之議起尋用瀋陽卻寇功復忬官

王癸志稿

列傳

三十

蔭一子已而寇復入遼陽副總兵王重祿敗績帝置忬不問治他將吏如律初帝從楊博言命薊鎮入衛兵聽宣大調遣忬言古北諸口無險可守獨恃入衛卒護陵京奈何聽調發帝怒降忬俸二級因問嵩邊兵入衛舊制乎嵩曰祖宗時無之自忬始因以言激帝帝由是惡忬三十八年把都兒辛愛數部屯會州挾朵顏爲鄉導聲言東入忬遽引兵東寇乃由潘家口入渡灤河西而大掠遵化遷安薊州玉田駐內地五日御史王漸方輅遂劾忬

張采志方輅受鄆懋卿囑言忬逗撓負上恩遂逮詔獄

下詔獄論斬方逮

時忬遣將擊寇獲級八百餘嵩故不報明年冬竟死西

市忬才本通敏其驟拜都御史及爲督撫皆帝特簡嵩積不能平而忬子世貞世懋負盛名力持風紀尤撻嵩忌灤河變聞遂致忬死穆宗卽位世貞與弟世懋伏闕訟冤復故官予卹祀鄉賢

凌汝志字雲鵠與弟雲翼同中嘉靖二十二年鄉試二十三年成進士授宜春知縣三年入爲刑科給事中疏論要地貪墨入覲官不當以賄贓當事憚之二十九年以直諫受廷杖轉工科給事中奉旨覈順天錢穀劾府尹不職罷之轉兵科左給事中巡視京營時蔣應奎竄子兵籍唐國相以子爲仇鸞家丁冒功濫襲汝志皆論

壬癸志稿

列傳

三十一

罷編遣陞戶科都給事中復以建言受杖居諫垣八年以親老乞官南都擢應天府丞卒汝志爲諸生時聞王守仁良知之說於錢德洪復卒業歐陽杲之門時謂其學業有本

凌雲翼名汝成以字行嘉靖二十六年進士授南京工部主事隆慶中累官右僉都御史撫鄖陽疏論衛所兵消耗六弊多議行萬厯元年進右副都御史巡撫江西遷兵部左侍郎兼僉都御史提督兩廣軍務時廣東盜林鳳遁入福建復入潮州雲翼檄呂宋番兵討平之尋進征羅旁羅旁在德慶州上下江界東西兩山間延袤

七百里阻箐剽掠有司歲發卒戍守雲翼乃大集兵分十哨令總兵張元勳李錫將之四閱月克巢五百六十俘斬招降甚眾岑溪等諸獠獍皆懼賊首潘積善求撫雲翼奏設官戍之改瀧水縣爲羅定州設巡道參將積患頓息六年夏討平河池哱咳北三諸獠捕斬廣東大廟諸山賊嶺表悉定召爲南京工部尙書改兵部兼右副都御史總督漕運巡撫淮揚兼督河道加太子少保以病歸卒孫必正有傳

徐敦字汝厚世居楊林寨故農家子試有司不利從賈年三十復謝賈事儒晝夜攻苦補諸生嘉靖二十六年

壬癸志稿

列傳

三十一

成進士厯知諸暨陽信二縣廉潔有威望以治行徵爲南京監察御史抗疏論鄢懋卿忤嚴嵩出爲山西僉事轉參議所至持法中蜚語歸又薦起刑部郎中陞苑馬卿終以介性與時寡合遂致仕官二十餘年蕭然如寒士

王世貞字元美忬予年十九登嘉靖二十六年進士授刑部主事屢遷員外郎中姦人閤姓者犯法匿錦衣都督陸炳家世貞摻得之炳介執政以請卒不許吏部兩推提學皆不用用爲青州兵備副使父忬繫獄世貞解官奔赴與弟世懋日蒲伏嵩門涕泣求貸嵩陰持忬獄

而時爲謾語以寬之忤竟死兄弟持喪歸蔬食三年不入內寢旣除服猶卻冠帶苴履葛巾不赴宴會幾十年隆慶初兄弟旣伏闕訟父冤言官薦起之世貞堅不出以八事應詔不允起大名副使遷浙江右參政山西按察使母憂歸服除補湖廣旋改廣西右布政入爲太僕卿萬曆二年九月以右副都御史撫治鄖陽數條奏屯田戍守兵食事宜有姦僧僞稱樂平王次子奉高皇帝御容金牒行游天下世貞曰宗藩不得出城而譸張如此必僞也捕訊之服辜張居正枋國以世貞同年生有意引之世貞不甚親附所部荊州地震引京房占謂臣

王癸志稿

列傳

三十二

道太盛坤維不甯居正婦弟辱江陵令世貞論奏不少貸居正積不能堪會遷南京大理卿爲給事中楊節所劾卽取旨罷之後起應天府尹復被劾罷居正歿起南京刑部右侍郎辭疾不赴萬曆十三年起南京兵部右侍郎以積俸得考滿蔭子擢南京刑部尙書移疾歸卒於家世貞好爲詩古文辭始與謝榛李攀龍宗臣梁有譽吳國倫徐中行輩結詩壇紹述李何復古之學其持論文必西漢詩必盛唐大曆以後書勿讀名出數子上顧盛推攀龍攀龍歿獨操文柄者二十年海內宗之祀鄉賢世貞三子長士騏字回伯萬曆十年鄉試第一十

七年成進士授兵部主事改禮部時儲位久虛有以冠婚及期請者上允行士騏爭以先冊立而後婚冠祖制不可違乃止歷文選稽勳司郎中沈一貫當國士騏故一貫門下士迫清議稍去就其間一貫銜之會得匿名書言傾儲事事連士騏取中旨削籍後光宗錄國本功追贈太僕寺少卿士騏字房仲工制義及古文辭世貞特奇愛之爲諸生蔭入太學會邑有海警士騏以兵曹在假鳩眾習射爲捍衛計士騏亦招聚材勇角藝於家或以招納亡命誣士騏當路下檄捕治旣得釋士騏自負累坎壈不平之氣悉寓諸詩歌識者謂有隱痛焉士

王癸志稿

列傳

三十四

駿字逸季諸生有才名早卒

周錫字子純參政在從子嘉靖七年以歲貢至京時世宗好道錫常爲學士陸深代作青詞深嘉之欲薦畱館閣錫賦埽雪烹茶詩以寓意深曰何至不可奪如是得潮州通判錫廉潔抗直爲都御史所厄棄歸生平篤於倫紀五十以後諸父燕集侍坐猶執壺終日不以委之僕隸年八十預刻死日作歌而逝祀鄉賢子渤見宦績傳

徐爌字文華嘉靖三十二年進士授長沙府推官丁嗣父憂服闋補武昌以治最徵爲四川道監察御史改山

西道巡視兩淮鹽課都御史希柄臣指歲增鹽課數萬
爨抗疏爭卒如故額旋爲北畿提學道有大學士某屬
其甥者爨曰視文何如耳竟置下等某銜之嗾科臣摭
事劾爨首輔徐階謂曰吾故識爨是減兩淮鹽稅御史
也尋弗問陞按察副使督江西學政值嚴嵩敗籍圖書
充棟悉置之學宮以惠士子遷山西行太僕寺卿致仕
爨性孝爲御史時聞本生父訃哭曰吾卽爲人後奈何
抱痛所生而綬若若耶亟引疾歸晚好神仙卒年七十
一

顧章志字行之濟子幼孤長通經術嘉靖三十二年進

壬癸志稿

列傳

三十五

士授行人時嚴嵩父子鬻權人爭趨章志獨弗往改司
副尋遷司正轉刑部郎中章志精律例多平反聲名爲
西曹最禮部尙書吳山器之請調儀曹以不當嵩意弗
果移病歸嵩敗補舊曹出爲饒州知府饒俗好訟吏窟
穴其中棼不可理章志至卽召吏庭列扶其尤貪黠者
餘以次聲罪眾重足立下邑訟片語決遺不齎宿日糧
浮梁縣景德鎮姦人與安仁豪以競陶器鬩嘯呼至千
人司治吏噤莫措章志適至從輿中諭以禍福悉散去
以治行第一進湖廣按察副使乞養歸母喪服除補廣
西靖江王汰所遣使馳驛章志叱曰未奉朝廷賜何得

稱馳驛止之民田有與王府屯地錯者王圖并得章志持不可進貴州右參政又進廣西按察使以參政致仕尋用薦起山東按察使讞決益精召拜南京光祿寺卿遷應天府尹南京兵部右侍郎故事選衛士富實者領都貢舫比上供苦中人朘剋多破家黠者避役至虛伍不成軍章志仿僱役法募諸篙師官爲馭之稍豐其值歲費約二萬五千兩米三萬石按衛士每丁輸銀可萬五千兩國家第益其半已除衛士累中貴無所侵行伍如故疏上報可未幾卒於官年六十四南都人肖像祀之章志奉母孝事兄如父師分其孤財如長子嫁二女

王癸志稿

列傳

三十六

先己女舅若姑姊貧病悉養而葬字其子及孫爲人廉潔溫直不顯貴加人亦不見賢智色子紹芳中萬曆五年進士由翰林庶吉士至春坊贊善有清望早卒

張振之字仲起少聰穎州同知周鳳岐試諸生得振之文驚喜問其父兄曰父老而貧兄名撫之適坐他事逮獄鳳岐立出之父士鏗感異疾躁不能席振之以身承得小安踰七晝夜而愈嘉靖三十八年成進士授處州推官時守入覲行守事首舉條鞭法詰暴橫貴要斂手秩滿當徵會嚴嵩秉國諸徵者多嵩客風振之以賄通不應嵩敗始就徵擢監察御史按通州糧儲衛官利掌

衛印以避漕運振之疏請漕運必用掌印官庶利害均用是官軍稱便著爲令定國公徐延德縱恣振之露章劾奪其任又得戶部尙書高耀姦利狀論之嘗過錦衣衛視囚振之欲仍宏治間故事繇中門入指揮使不聽與詰難緣是多恨者借事搆之謫臨清州判旋移廣信遷撫州同知撫多盜振之籍捕卒令日一人直盜發罪直者亡何獲其魁弊之獄盜衰止署崇仁縣事清徭稅入爲南京兵部職方員外郎遷南吏部文選司郎中出知吉安府與廣信撫州鄰壤振之久歷土風治行益精敏吉水知縣暴戾欲去之縣有所恃不能勝憤恚乞

王癸志稿

列傳

三十七

休未報歸事聞奪官居久之起知杭州尋晉按察副使備兵溫處病歸卒年五十七祀鄉賢振之服官二十年食不能具肉罷吉安歸橐中不滿二金見盥具爲署中物投之水學宗考亭不甚喜姚江然身踐不欲能言性好行義吉安丞張大猷卒婦妒妾生子流落民家爲置保姆以歸於張長甯令沈某盡室死爲治喪具以孤孫託有司天台令死於官女孫入伎家亦贖以還之其外家有仇嘗侵振之後道見桎一婦則仇者之妻以逋賦故囚於官爲代償得釋居常念受知周倅歲時寓書幣亡絕孫峽字九服有文學以鄉舉終

王世懋字敬美忬次子十歲病瘵父憐之不強以學乃私習爲文章弱冠入太學嘉靖三十八年成進士未幾遭父難與兄世貞伏草土者幾十年爲詩歌相勞苦海內慕之呼小美隆慶初從兄白父冤二年以薦授南京禮部主事歲餘擢員外郎內艱服除補郎中踰年遷尙寶司丞時臺臣傅應楨劉臺論張居正得罪世懋數左右之居正怒出參議江西又明年進副使理驛傳改陝西提學副使請急歸後居正卒起浙江提學辭再起福建晉布政司參政擢南京太常寺少卿萬曆十五年病歸卒年五十三世懋負文名立身嚴正在南京禮部時

王癸志稿

列傳

三十八

魏國公有兩庶子長邦瑞弗愛愛邦甯欲立之時邦甯母鄭氏已冒封而邦瑞循例襲封當先入國學或說祭酒返其牒尙書林某無以難也世懋奮筆爲移文言鄭氏未受封生邦甯則均庶庶均宜長有國法在遂卒嗣邦瑞署江西按察使南昌令用苛察當上官意後益驕橫世懋盡發其姦聞者快之嘗閱訊牒一字異前讞呼取較之果舞文窮治抵罪省屬皆懾之臨歿遺兄書云願廟堂勿固寵勿近小人勿聽讒搽人過諸君勿偏見勿立黨勿私報復卽死無憾矣語不及私卒祀鄉賢子士騶字閑仲中萬曆二十二年鄉試亦有文名

王錫爵字元馭嘉靖四十一年會試第一殿試第二授編修累遷至祭酒萬曆五年晉詹事張居正奪情吳中行趙用賢等疏詆之居正怒錫爵邀同館十餘人詣居正求解居正不納錫爵獨造喪次切言之居正徑入不顧中行等既受杖錫爵持之大慟復祖郊外明年進禮部右侍郎居正甫歸治喪九卿急請召還錫爵獨不署名旋乞省親去十二年冬卽家拜禮部尙書兼文淵閣大學士參機務還朝請禁諂諛抑奔競戒虛浮節侈靡闢橫議簡工作帝咸褒納時羣臣請建儲者眾帝皆不聽錫爵疏請勤御朝講日親大臣時披閱章疏而早定

王癸志稿

列傳

三十九

根本之計升儲出閣温旨報聞十八年元日帝御毓德宮召輔臣入手握皇長子令就視輔臣趨拜已命皇三子出輔臣擬拜如前帝力止曰不可旋出雒于仁疏欲實罪日屬錫爵錫爵因言于仁誠有罪第當以重典恐天下不知于仁訕上直謂陛下拒諫帝意解因以冊立豫教請復屢疏上帝手諭倫序已定朕何敢私特以長子羸弱待十歲後大典並行錫爵因語人曰聖意無他第不欲發自臣下吾屬當靜聽十九年夏請歸省母乃賜道里費遣官護行二十一年趣召還朝先是有旨是年春舉冊立大典錫爵密請帝決大計帝遣內侍手詔

示錫爵欲待嫡子令元子與兩弟且並封爲王錫爵懼失帝指立奉詔擬諭旨而又言漢明帝馬后唐明皇王后宋眞宗劉后皆養諸妃子爲子請令皇后撫育元子則元子卽嫡子亦擬諭以進帝竟以前諭下禮官令卽具儀於是舉朝大譁羣詣錫爵第力爭章日數上錫爵力請追還前詔帝不從請下廷議不許請面對不報乃自劾三誤乞罷斥帝亦迫公議追寢前命七月彗星見錫爵疏言彗星漸近紫微惟建儲一事可以禳之有旨報聞仍持首春待期之說十一月皇太后生辰帝御門受賀畢獨召見煖閣錫爵因力請早定國本帝曰中宮

壬癸志稿

列傳

四十

有出奈何對曰此說在十年前猶可今元子已十三尙何待况自古至今豈有子弟十三歲猶不讀書者帝頗感動遂有出閣之命明年二月出閣禮成輔臣侍班詞臣六人侍講讀如東宮儀中外爲慰錫爵在閣時嘗力止礦議罷江南織造江西陶器減雲南貢金出內帑賑河南饑帝皆無忤眷禮逾前後諸輔臣其救李沂力爭不宜用廷杖尤爲世所稱特以阿並封指又郎中趙南星被斥侍郎趙用賢放歸論救者咸遭譴謫衆指錫爵爲之雖連章自明且申救人卒莫能諒也錫爵遂引疾乞休疏八上乃以吏部尙書進建極殿賜道里費乘傳

行人護歸比行以懲忿怒躬廟饗等十三事進規歸七年東宮建遣官賜敕存問賚銀幣羊酒三十五年廷推閣臣帝既用于慎行葉向高李廷機還念錫爵特加少保遣官召之三辭不允時言官方厲鋒氣錫爵進密揭條數事而南省訶得之撫爲罪又追論前並封事攻者益譁上眷愈厚錫爵竟不出又三年卒於家年七十七贈太保諡文肅祀鄉賢

周士淹字孺亨廣子性純厚有儒素風事繼母盡孝無間言中嘉靖十六年舉人博通羣籍究心理學與兄士涓師事魏恭簡校俱以學行稱

壬癸志稿

列傳

四十一

龔起鳳字瑞周始冒周姓名江中嘉靖三十七年舉人改姓名授定州學正起鳳性潔清自待嚴重時定州知州由中朝左遷諷起鳳拜持不可曰無兩失也應聘典中州試與御史數爭事尋擢大理寺司務寺胥例納免役錢時正卿王篆屬起鳳徵錢不應篆怒笞其役起鳳亦笞篆役被劾謫嚴州府學正遷杞縣知縣受事縣見囚三百人多冤濫起鳳縱去畱十二人鄰府歸德有豪李某殺人賄令脫死上官移起鳳訊未至二十里令欵迎惟謹至則私致千金起鳳叱退窮治伏罪縣故事令得有馬價夫價金五百起鳳以歸官日食蔬菜一簋僕

二人不勝困皆逃歸則蕭然襍被闔戶寢興日給小史銀二分具飲食御史行縣供帳儉率寒月鑪火不繼御史自出錢以風起鳳起鳳若不聞監司謂曰按君嚴重奈何令坐折腳牀起鳳曰瑣事安問此監司匿笑亡何以不及論罷縣爲罷市旣行泣送者萬人又釀三百金請曰使君卽不念家當顧行路起鳳曰勞苦父老我單行無可恐卻去時周王以百金贖亦卻不受曰罷吏謝王願畱惠百姓起鳳歸灌園園惟種韭里中持錢往則開園刈韭若不知爲官人時稱龔公韭如是積年乃卒卒時塋爲具棺先是塋嘗冒受金爲起鳳所恨至是張

壬癸志稿

列傳

四十一

目云卽親螻蟻母污我友人張振之合錢治後事始得殯昔州人以姜公廉素稱姜麥粥因亦稱起鳳祀鄉賢王鼎爵字家馭錫爵弟少依兄受經堅苦自力讀書不五百過不易隆慶二年成進士授刑部主事調禮部移疾歸已補主客司郎中時錫爵爲禮部侍郎故事引嫌改南京吏部驗封司會張居正以奪情事銜某屬南考功將黜之鼎爵請解弗得貽書錫爵曰時乎有變因有歸志尋陞河南提學副使不數月移疾歸丁外艱服闋病卒年五十鼎爵氣度和緩與人交周篤事兄極謹然意所不可卒弗傳會厯官精勤居家好施與凶歲出轡

車數百他所全活者無算卒祀鄉賢

管志道字登之居毛家市後徙長洲隆慶五年進士除南京兵部主事時衛卒苦貢舶志道言於尚書裁去三百歸江濟二衛中江淮有悍卒讐一千戶聲言本兵行驅漕卒入操練激眾伺隙起都人恐志道佯不動徐治其渠旋解丁外艱服除改刑部張居正秉政志道上疏條九事以譏切時政所陳內有欲修高皇掌故巡道與巡按抗禮居正度御史勢重必不受遂出志道廣東僉事志道之官竟伸前議疏入不報而御史劾果上得旨降調志道正彊盛會大計實老疾然名益重久之以臺

壬癸志稿

列傳

四十二

疏還舊官仍致仕會薦起湖廣言者復尼之乃決歸志道初受知於督學耿定向與羅汝芳王璧相師友講解理學然晚年頗涉禪說卒年七十三曾孫正傳崇禎四年進士歷知永豐顛縣著風節爲忌者所中以冤夭死毛在字君明萬曆二年進士授建昌府推官禁暴戢姦豪猾屏跡丁父艱服闋補金華課最擢雲南道御史出按貴州平牙寨苗瓮賞等之亂請廣解額建縣治以懷遠人思南諸生蕭重望爲繼母誣繫獄論死在覆訊得實出之命賦鸛巢古木詩奇其才令赴鄉試時已屆八月以飛騎送詣試場榜發領首薦明年登第又按山東

歲大侵請蠲賑疏凡五上竟得俞旨宗聖公曾氏裔孫流寓遠方至是始歸嘉祥補博士在特請改三氏學爲四氏學遇駕幸太學并取以陪祀與孔顏孟子孫埒又按河南陞大理寺右丞以疾卒於京邸在生平不營家產置義田二頃以一頃贍族人餘以助貧者區役

沈昌期字廷際其先山東滕縣人萬曆十一年成進士授龍溪知縣申雪誣枉一縣稱神故事以贖緩積穀多寡爲令殿最昌期奏記言令不能興訟致金粟御史躡之邑田負山枕海被水衝齧多失額豪右率隱占昌期下令清丈許自實不實有罰人不敢隱科其糧以抵失

壬癸志稿

列傳

四十四

額又興水利墾曠土歲得穀千石於是葺學舍新鄉賢祠文教翕然瑩獨鰥寡收卹備至擢驗封司主事歷遷至文選郎中在部五年抑絕奔競因推陞建言礦稅害謫大埔典史怡然就道旋歸里及卒家無餘貲熹宗初年錄礦稅註誤諸臣贈昌期太常少卿祀鄉賢子綿應字麟系諸生以薦授辰溪知縣爲政有惠愛崇禎十五年卒於官貧甚鬻書以殮遠近聞之爲罷市

張輔之字爾贊本姓尤後改今姓爲張振之所知萬曆十四年進士授行人十九年選工科給事中歷禮兵兩科晉兵科都給事中時哱劉反西夏督臣頓兵不進輔

之疏糾之復陳方略數事倭酋破朝鮮樞臣議主欵貢
輔之論止之播酋楊應龍介黔蜀間擾害尤甚輔之請
特設總督責成蕩平在兵垣前後四十餘疏凡歷三大
征區畫事宜悉中機要御史曹學程忤旨擬辟時值廷
審多署情實輔之獨會疏救得未減歷太僕太常寺卿
晉工部右侍郎務節省足國用察姦商破冒物料及胥
吏濫用稍食弊竇一清天啓三年晉南京工部尚書四
年乞休歸里崇禎二年卒年八十三祀鄉賢

錢桓字握之萬曆十七年進士授任邱知縣丁艱補藁
城擢山東道御史巡視京城出按畿南再按四川入掌

壬癸志稿

列傳

四十五

河南道陞太僕寺少卿以僉都御史巡撫南贛目眚乞
休歸又數年卒桓長者中立無所黨歷有政實任邱地
衝雜中人豪貴治以清肅稱盜劫富民未獲富民乘歲
暮凌遽執其讐抵之桓疑非是故緩其獄富民請成讞
桓叱詰語塞竟獲真盜釋所執者按畿南時邯鄲井陘
間大俠恣橫桓實諸法三輔震栗四川前御史與安酋
隙議削地巡撫持未決桓至謂其地屬僭據削猶後若
安故壤削且生牂牁餘種心迺弗削安酋以故不叛蜀
歲榷酤四萬中人徵督爲厲桓同巡撫割贖緩代之民
以不擾章貢水溢漂民廬舍桓急請賑報可苗蠻時豨

突桓戒將吏守要害母弛備母貪細功諸蠻讐服信豐
令貪墨撫按庇之桓力劾去兩關稅萬計舊隸幕府桓
檄關吏薄其權籍貯府藏備兵興旱潦費念蜀宗祿不
給置公田以時發桓性儉日鮭菜一盂居鄉清謹約束
子姓至今頌其醕德子炳以明經授富陽令次子燧天
啓元年副榜歷任英德仁化知縣經濟俱有父風桓炳
俱祀鄉賢

王在晉字明初早失父家貧受書於兄在恆母病痿身
自抱持者累年萬曆二十年成進士授中書舍人轉工
部主事陞興泉道平海寇有功丁母憂服闋補荆南道

壬癸志稿

列傳

四十六

改副使湖廣學道轉杭嚴道以卓異遷江西左布政擢
都察院副都御史巡撫山東陞工部侍郎卽授添設兵
部左侍郎總理戶兵工三部遼民渡海聚登萊請金十
萬并發山東所積穀賑之水西藺酋反舉朱燮元等征
勦蜀遂平天啓二年特授兵部尚書賜蟒玉尚方劍代
熊廷弼經略薊遼等處已召還爲南兵部尚書轉吏部
歷刑兵兩部尚書崇禎初致仕卒年八十祀鄉賢子會
華字元升諸生蔭錦衣衛中所正千戶丁憂家居順治
二年 大兵下蘇州會華七日不食死

王衡字辰玉錫爵子讀書五行俱下錫爵忤張居正時

衡年十三倚膝誦歸去來辭錫爵歎曰不去乃爲孺子笑卽日歸錫爵後柄用萬曆十六年衡舉順天鄉試第一郎官高貴饒伸疏論有私詔會午門外復校衡通敏人皆歎服伸猶疏不已上怒譴伸衡請錫爵疏救人更以此多之二十九年會試成進士廷對第二人如其父授編修是歲奉使江南因請終養久之病瘍卒年四十九祀鄉賢衡詩文俱名家尤長經世略注意邊務侍父京邸頗有所左右論者多惜其未用於世

王遇賓字叔元父文澗有兄年老爲人所訟吏捕之急文澗負兄代辯知州呵責甚厲文澗伏地請曰兄年老

王癸志稿

列傳

四十七

受刑必死某壯願代守義而釋之遇賓幼攻苦讀書受易於歸有光萬曆三十二年成進士知直隸青縣邑大饑設糜施賑部署井然調河間邑有馬戶出貲養馬弊則買償當之者困遇賓請以公帑市而盡除其籍地多中貴莊宅一切裁以法治五載巡按薦牘二十四上行取至京補大理寺正四遷至刑部郎中出知四川渝州府白蓮妖眾屯結境內縛渠魁投之江支黨解散秩滿陞按察副使備兵川南四十六年藺州安酋與黔地奢酋共作亂臺檄遇賓單車往諭安酋受命引退復受檄勘訊黔蜀將吏受安酋賂多所隱匿遇賓據實以聞勘

案遂定尋乞歸卒年七十有六祀鄉賢當遇賓勘事畢適遼左軍興奢崇明子寅請率一旅自效遇賓力止之曰此酋包藏禍心令借勤王名奮袒疾呼全蜀危矣後調兵檄至奢酋捲甲趨渝遂叛人服其先見云

陸獻明字君謨萬曆三十五年進士除嘉興知縣以廉能入爲御史巡按貴州時水西酋安邦彥叛甫入境而撫臣王三善之師覆沒獻明馳援徵調川湖兵防隘轉餉無乏開屯五百餘里列柵二十餘歲得米二十餘萬石黔中藉以無恐改按湖廣僚屬請建魏奄生祠獻明裂其牘楊漣瘐死詔獄捏贓三萬行撫按嚴追獻明捐

壬癸志稿

列傳

四十八

俸及贖緩代完之適黔事壞巡按傅宗龍丁艱內批復命獻明按黔加太僕少卿監軍務獻明聞命就道疏言欲破水西當用重兵三方並進後用其言復所失地七百里安酋平轉正卿思宗登極上疏謂新政必以勤學用人爲先因薦文震孟陳子壯顧錫疇李繼貞等皆先後擢用使竣還京又上疏請裁節驛站諸事皆切要致仕歸林居十年杜門不出年八十一卒祀鄉賢子日升崇禎十五年舉人終父喪悒鬱死

王志堅字淑士臨亨子萬曆三十八年進士選南兵部主事南曹故閒暇志堅要同舍郎爲讀史社商略前代

行事又假焦竑藏書繕閱無少懈秩滿陞僉事提學貴州以養親辭來往山間至眞珠塢樂其風土築山房讀書其中薦起浙江水利僉事念迎養便就官時議毀德勝諸壩令估艇直達會城志堅謂壩毀則湖涸蓄洩亡恃將水旱均病事乃止會餉急温州推官創票鹽法商大困志堅又力陳非是乃已丁母憂去起湖廣驛傳道清黃州九驛馬價驛得亡累隨遷其省提學道拔寒畯名試文錄曰昭質未終任而卒年五十八志堅恂恂蘊藉負狷性門無雜賓坐起一小樓讀書最有法經先箋疏後辨論史先證據後發明爲世所宗嘗戒子弟曰願

王癸志稿

列傳

四十九

汝曹爲學究弊不過迂文人所流恐破方爲圓猶弗止也

李繼貞字散尹萬曆四十一年進士除大名推官歷遷兵部職方主事天啓四年典試山東坐試錄刺魏忠賢削籍崇禎元年起補武選司進職方郎中時軍書旁午職方特增設是職焉繼貞幹用精敏尙書熊明遇深倚之四年孔有德反山東明遇主撫繼貞疏陳不可請調關外兵入勦明遇不能從後訖用其言滅賊初延綏盜起繼貞請如神廟故事遣御史齎米三十萬石以往安輯饑民以孤賊勢帝遣御史吳牲以十萬金往繼貞少

之帝不聽賊果日熾繼貞在兵部久邊事益練習爲人清執請謁不得行大學士周延儒繼貞同年生屬總兵官於繼貞繼貞瞠目謝曰我不奉命必獲罪刑部獄甚寬可容繼貞也延儒銜之田貴妃父宏遇以坐門功求優敘不獲中官曹化淳欲用私人爲把總言於尙書張鳳翼以命繼貞繼貞亦不可化淳怒與宏遇日伺隙讒之帝貶三秩會繼貞請起用巡撫梅之煥帝遂發怒削繼貞籍已論四川桃紅壩功復官致仕十一年用薦起歷兩京尙寶卿尋遷順天府丞超拜兵部右侍郎兼僉都御史巡撫天津督薊遼軍餉乃大開屯田五萬一千

壬癸志稿

列傳

五十

頃歲收穀數萬斛城中地渴鹵相地鑿渠井汲飲無乏舊制遼餉米豆每歲召賣於各州縣餉司葉廷桂多侵牟繼貞繩以法廷桂結廠衛陰中之會劉應國兵失利詭言津登兵後期論罷已帝念繼貞不置卽家拜兵部右侍郎操江巡撫命下繼貞卒贈右都御史官一子祀鄉賢繼貞學有根柢工文章負經濟居官實心任事孤立獲主知未竟其用天下惜之

徐憲卿字九亮萬曆四十一年進士授行人泰昌元年擢南京工科給事中掌計典尋管京營軍務時閹黨用事三案議起憲卿疏論李可灼侍疾不謹宜按祖宗法

死無赦天啓四年疏言駕帖之僉北司之拷非所以示天下公宜以罪犯付法司內外章奏還內閣職掌無使輔臣失職其言皆侵權璫已又疏糾忠賢客氏及其所用要人姦黨側目時緹騎四出迭起詔獄或說以委蛇解禍憲卿不爲動忠賢死進添註南京光祿寺少卿陞太僕寺少卿駐滁州視江南北馬政土寇大至憲卿率民兵登陴寇不能攻又五年以病致政歸甲申聞國變時時慟哭而卒年八十有二祀鄉賢

黃元會字經甫幼孤感奮爲學與同郡姚希孟齊名萬曆四十一年進士授工部都水司主事管窯器廠光宗

壬癸志稿

列傳

五十一

在儲位宮監傳諭索器皿折價元會抗言曰非所以光潛德也不與攝大木廠因殿工立註銷積高法中人不
能私督夏陽闡工省帑數千事竣擢南昌知府廉佐令
之貪橫者黜之宗室驕橫一裁以法削其冒封二人省
廚傳之擾庇死難武臣之子卓異入覲賜宴禮部如一
品大臣儀稱異數陞按察司副使主驛傳視卒麗罪重
輕定爲三等供役法尋轉提學副使益藩以清道撻士
士譁王疏聞元會調護得薄罰會鄉試迫以百餘日畢
十三郡試勞勩成疾轉山東布政司參政撫按請畱仍
改江西按察使疾作乞歸卒年五十一祀鄉賢元會喜

黃老家言神識清遠不屑詭隨亦不皎皎異故終身不受牽於門戶焉

許國榮字允尊二歲喪父家絕貧母朱氏育之天啓五年成進士授太常博士三年選工科給事中時太監掌廠事布邏卒訶刺中外目懾又張彝憲總督戶工兩部陵部曹國榮上疏極論觸彝憲恨未幾外解鉛至國榮監收固中額中人報闕少激帝怒褫職後七年事白起補應天府照磨量移光祿寺署丞病卒祀鄉賢國榮在諫垣章數十上論復大甯救罪謫諸臣尤中事要事母至孝母性嚴少不如指卽詬誅國榮長跪請母色霽方

壬癸志稿

列傳

五十一

起以爲常與人交有本末周恤親黨多待以舉火者
吳震元字長卿總角補諸生萬曆四十年領鄉薦天啓二年授灤州知州旋補德安通判時方追熊廷弼楊漣貲產震元力庇之且分俸周其家七年陞衡州府同知改漳州黃道周少所許可獨喜與震元說易崇禎五年海賊劉香入犯檄震元守石美以計擒之六年春紅賊亂震元守銅山督將士力戰大破之丁父艱歸不復出震元博通經史尤精讖緯推知崇禎十年以後數當陽九歎曰只今便高臥已負半生閒因作負半庵杜門著述周延儒強之出不應十五年病卒

顧燕詒字安彥其先滁人崇禎元年成進士授刑部主事出守濟南蠲除苛政歷五載擢福建驛傳道以平賊功調嘉湖兵備時浙西爲盜藪燕詒至則完城郭蒐卒伍儲芻芟有保民四事書值嘉善漕卒變燕詒輕騎往諭指顧懾服又興築海塘保障二郡晉按察使陞右布政使先是吳昌時官文選司郎中倚勢張甚燕詒拒弗與通昌時銜之誣劾燕詒奪職閒住歲餘昌時死東市燕詒得雪復官入國朝有欲薦燕詒者以疾辭知州白登明禮婁東七老燕詒居首平生性剛直於社局獨無所附康熙六年卒年八十五子景錫進士光復副貢

壬癸志稿

列傳

五十二

生

張采字受先崇禎元年進士父早卒事母至孝弱冠益折節讀書時海內學者喜誦諸子書爲文多詭異同里張溥與采相砥礪期以六經史漢倡天下已先後成進士世遂翕然服從采謁選歸病里中顯者多縱恣乃集薦紳於城隍廟而誓曰吾儕讀古人書幸通籍母以勢凌人母縱奴僕橫母使宗黨子弟肆里門母聽私屬隸官府有逾約者共斥之眾曰諾風俗始少戢及授臨川知縣敦儉約奉母間進肉妻子以下率烹葵食之恤民繩暴善政畢舉尋移疾歸先是張溥舉復社采歸與其

事爲陸文聲周之夔所訐及溥卒采獨具疏直之事詳溥傳十四年旱蝗采請於州四門設粥廠活萬人又作常平倉立鄉約及保甲法知州錢肅樂尤重采民有不便采白之無不從豪猾銜之刺骨江西艾南英移書規諫不聽福王時起爲禮部儀制司主事陞員外郎已奉使歸乙酉里中巨猾數十輩給采出捶之幾死一僧伺間負之走得脫自後東西竄伏輒南向痛哭三載卒年五十三采好善嫉惡出於天性修輯州志皆直筆嘗過紹興與劉宗周講學宗周極推之瀕行封黃柑四枚馳數十里爲贈尤畱心經濟嘗與程峴定海亂卒祀鄉賢

壬癸志稿

列傳

五十四

張溥字天如翼之子溥幼嗜學所讀書必手鈔鈔已朗誦一過卽焚之又鈔如是者六七始已右手握管處指掌成繭冬日手皸日沃湯數次後名讀書之齋曰七錄以此也與同里張采共學號婁東二張崇禎元年以選貢入都采方成進士兩人名徹都下已而采官臨川溥歸集郡中名士相與復古學名曰復社以繼東林四年成進士改庶吉士以葬親乞假歸讀書若經生日有常程每侍史繕錄口占手注六七輩不給四方人士翕然歸之以不及其門爲恥所品題甲乙頗能爲榮辱溫體仁惡之里人陸文聲者輸貲爲監生求入社不許因詣

闕言風俗之弊皆原於士子溥采爲主盟倡復社亂天下下所司問狀皆言復社無可罪閩人周之夔嘗爲蘇州推官坐事罷去疑溥爲之聞文聲訐溥遂言溥等把持計典已罷職實其所爲因及復社恣橫狀章下巡撫張國維等國維言之夔去官無預溥事提學倪元珙兵備馮元颺力言諸生誦服聖賢引徒講學實非黨有旨降謫至十四年溥已卒而事猶未竟刑部侍郎蔡奕琛坐黨薛國觀繫獄未知溥卒也訐溥遙握朝柄已罪由溥因言采結黨亂政詔責回奏采上言復社非臣事然臣與溥生相淬礪死避網羅負義圖全誼不出此念溥

壬癸志稿

列傳

五十五

日夜解經論文矢心報稱曾未一日服官懷忠入地卽今嚴旨之下并不得泣血自明良足哀悼當是時體仁已前罷而周延儒當國溥座主也故采疏上事卽解明年御史劉熙祚給事中姜埰交章言溥砥行博聞所纂述經史有功聖學宜取備乙夜觀因薦采學行帝御講筵問及二人延儒曰讀書好秀才帝曰溥已卒采小臣言官何爲薦之延儒對曰二人好讀書能文章言官爲舉子時讀其文又以其用未竟故惜之耳帝頷之遂有詔徵溥遺書有司先後錄上三千餘卷帝悉畱覽溥性忠孝事母極婉順談朝廷事輒欲有所澄清與朋友周

篤聞正人患難如身受卒時年止四十祀鄉賢門人私諡曰仁學先生

凌必正字聖功雲翼孫崇禎四年進士授戶部主事出爲建昌知府有異政忤上官意左遷真定同知旋署府事陞廣西兵備按察副使潔已惠下士民戴之十七年歸里屏跡荒野與華乾龍陳瑚講學論古終其身 國朝順治間知州白登明舉鄉飲賓必正性耿介善屬文兼工楷法精繪事卒年六十三

錢增字哀卿桓孫崇禎四年進士授行人奉敕封藩風骨嚴峻擢兵科給事中轉刑科都給事年四十二乞終

壬癸志稿

列傳

五十六

養歸 國朝順治九年撫按交章薦以母老辭增居諫垣時讜直敢言嘗劾楊嗣昌誤國狀疏請開濬劉河條列八事已議行值國變未果後知州白登明大開劉河悉宗其說卒祀鄉賢

吳克孝字人撫弱冠爲諸生家貧有富人饋粟十鍾卻不受李繼貞器之崇禎三年鄉試吳江令熊開元拔冠其房十年成進士丁母憂服闋除刑部主事進員外郎備兵保定以目眚去職十七年用薦補嘉湖道僉事官刑部時恤刑粵東平反滯獄至千二百餘人比報政會開元下錦衣獄奉密旨卽訊取死狀以聞克孝夜半詣

金吾請寬旦夕卒以營護得遣戍去在保定境內殘破盜賊晝抄掠郡縣日選丁壯乘城克孝至盡撤之而密擒渠魁秦鳳吾等斬以徇抗疏言闖賊披猖方今所憂不獨關陝洛陽宜宿重兵韓趙以壯神京右臂當國惡其直報罷克孝乃日爲補苴計峙糗糧繕城隍復險隘墾荒土萬餘頃易州礦使橫克孝咎其卒而直陳礦使諸不法當國欲罪以擅責禁校尙書鄭三俊救之得免在嘉湖募健勇練水師擒盜黃文魁姚二等弊之桀盜葉六集黨千餘劫官鞘郡縣莫敢誰何又斗張三者驍勇過於葉俱捕以正法監軍太監高某擁潰師抄暴克

壬癸志稿

列傳

五十七

孝嚴兵待之璫引遁克孝搢梧彌瘁日晷益劇遂告歸嘉湖人遮道泣送至有赴水挽舟而沒者三人 國朝初華亭程子龍亡命吏疑克孝素與善匿之被逮未至而事解性好義急桑梓利害罄貲弗惜也卒之日貸錢買棺以殮年八十一祀鄉賢

胡周鼎字其章崇禎十三年進士授刑科給事中立朝數月封章十餘上嬰權忌罷職明年復起以親老辭鼎革後會海警知州李作楹用其策守城邑中安堵有詔直省大吏起在籍搢紳周鼎辭不赴

顧夢麐字麟士其母夢神人授以石麒麟而生故名崇

禎六年以副貢入太學夢麇寢饋六經縱橫百氏嫉當時文風潰決畔違傳註乃獨闡正義著四書說約海內翕然宗之稱織簾先生時薦辟令下巡撫張國維欲保奏之夢麇固辭或冒其名走謁當路貴人遂被欵接委職至府通判夢麇聞之曰我自爲我彼焉能浼我哉竟不發其事人推爲長者卒祀鄉賢子湄有傳

陳瑚字言夏朝典子少通五經凡天官河渠兵農禮樂以及壬奇諸書無不貫串與陸世儀江士韶盛敬相齟切世所稱四先生者也崇禎十五年領鄉薦明年江南大饑上當事救荒四政支吾三策搯腕時政著私議十

壬癸志稿

列傳

五十八

條又著續議五條皆切要或勸上之曰此非借箸時也遭亂奉父避地崑山之蔚村躬耕以養村田沮洳瑚導鄉人築岸禦水歲獲豐穰又與陳說孝弟之義及爲善三約遠近嚮風遊其門者多俊偉之士冬月常衣單袂客有重裘者欲解以贈竟席不敢言退而語人曰吾乃知當世有陳無已也 國朝詔舉隱逸知州白登明將以其名上督撫瑚力辭乃已卒年六十三門人私謚曰安道先生蔚村人立祠祀之巡撫湯文正斌卽其故居爲立安道書院祀鄉賢

陸世儀字道威諸生天姿英邁弱冠志聖賢之學謂孔

子之後有眞儒周公以下無善治其學以居敬窮理爲本而推極於體國經野凡天官地理禮樂河渠以至用兵行陣之法口區手畫燦若列眉窮居授徒隱然負開濟之重鼎革後絕意科舉體驗益精著述益富順治間督學張能鱗具禮聘輯儒宗理要後常講學於錫山東林書院說易於毘陵大儒祠設教於雲陽黃塘聞風親炙者皆感動奮發卒年六十一門人私謚尊道先生亦曰文潛先生祀鄉賢

江士韶字虞九御史有源曾孫弱冠爲諸生與陸世儀陳瑚講程朱之學家素裕後中落遊郡縣幕藉脩脯以

壬癸志稿

列傳

五十九

養律已四戒不徇情面不通竿牘不職苞苴不通外內舞文所至敬信然往往與懷私者忤卽別歸坐是貧益甚父年高士韶愉色婉容卽僅陳菽水其父未嘗不樂也及卒哀毀骨立其遭母喪也士韶適從楚歸號慟四十餘日無輟聲以遊橐葬兩親不問弟姪族叔某貸百金於友漫以士韶證後不能償士韶以已田償之同時理學諸儒多著述士韶以爲三代聖賢之旨盡於昔儒之論說惟在躬行而已晚年取平生所作聚而焚之故不傳於後云

盛敬字聖傳諸生家貧處之泊如名其所居曰寒溪書

屋矢志存誠主敬之學鼎革後教授寒溪上以成就後學爲事平生篤於孝友居喪盡哀三年不飲酒食肉有弟遇之無禮敬終始怡怡年七十六卒遺訓凡浮屠妄誕之說概勿用門人私諡曰貞介先生祀鄉賢

郁法字儀臣諸生篤志好學通懷樂善聞陸世儀與同志講程朱之學慨然慕之家有樓曰靜觀宏敞爽塏迎州學正雲南文祖堯講學其中邑中會者至數十人曹煒曹鈞錢墀夏有光之屬咸與焉煒字暉吉從文祖堯熊開元論學有得性孝友與人交無町畦誘善規過人樂近之鈞字尊素幼失父母事庶母惟謹鄉黨稱孝與

壬癸志稿

列傳

六十

陳瑚陸世儀江士韶盛敬諸人遊誼甚篤嘗風雪中念士韶貧病呼舟攜錢往贈順治九年歲大饑民困徵輸鈞赴淮上陳分年帶徵之議臺使者如議奏准困得甦劉河塞與顧士璉條浚之墀字人衷桓孫與江士韶相磨切所學亦精詣有光字玉汝以武舉爲閣部史可法標將揚州破退隱巴湖與陳瑚陸世儀等講學見淮雲問答

華乾龍字天御崇禎十二年舉於鄉事父母孝居喪不入內絕葷酒三年事兄老益恭甲申後遯居荒野謝絕人事巡撫湯斌昌明理學延乾龍主講席以疾辭乾龍

於學無不闕而未嘗以文章名舉足言笑必以禮而未嘗聚徒講學窮居隱約短褐不完年垂八十怡然安之曰我道然也與吳門徐枋稱兩隱君子卒後門人私謚安止先生

王育字子春家貧好學於書靡所不覽嘗元旦筮易得復之初九次年元旦復筮得之育曰天教我學顏氏之學也遂與陸世儀陳瑚盛敬諸人講學積力深思幾進於道性强毅人敬愛之居家擯絕異端喪葬悉從古禮鼎革後角巾方袍與世泊如康熙間舉鄉飲賓又詔舉山林隱逸皆辭不應卒年八十八易簣前一日猶與

王癸志稿

列傳

六十一

友人講易如平時育於五經皆有著述又嘗以六書之學失其傳乃推古聖賢造字之本根於六義證以五經積十餘年成三十萬餘言旁通岐黃之術其剖析多奇秘云

顧士璉字殷重諸生練達時務劉河淤三吳連困於水當事議浚以費繁而阻知州白登明用銷圩法先疏朱涇繼疏劉河用士璉議也後吳中潦撫藩復議疏劉河淤段延士璉問策士璉請仿海瑞折漕例約以四萬兩浚淤段五千丈建閘天妃鎮以利蓄洩從之先是崇禎甲申秋大旱米價騰貴民無以完漕士璉與陸世儀江

士韶曹鈞王發祥何甯國等走南都請折州民醵千金爲費旣得請費悉散還之平生講求實學尤以澤物爲念拯難濟急有國士風年八十有四卒

國朝

王時敏字遜之衡子幼孤以祖蔭授尙寶丞屢奉使藩封天啓四年陞正卿丁內艱服闋遷太常寺少卿仍管尙寶事又五年謝病歸家居飭內行著家訓勸諸子讀書砥行維持善類獎掖英髦以其身繫鄉黨重者四十年時敏性通達工筆札尤善書畫畫師黃公望分隸學魏受禪碑參用夏承碑法寸縑丈幅海內珍之卒年八

壬癸志稿

列傳

六十一

十九祀鄉賢子挺揆撰持抃扶攄揆抑持字平宰扶字匡令貢生餘自有傳

吳偉業字駿公愈玄孫父琨以經行稱鄉里偉業幼有異質篤好史漢張溥見而奇之因畱受業於門崇禎四年會試第一思宗批其卷曰正大博雅足式詭靡殿試第二授翰林院編修給假歸娶時有姦民首告復社事當軸陰主之欲盡傾東南名士偉業疏論無少避九年充湖廣鄉試主考官因召對言冢臣職司九品若所舉不當何以責之臺省輔臣任寄權衡若所用不賢何以責之卿寺帝深韙之冊封延津孟津兩藩陞南京國子

監司業會黃道周論楊嗣昌奪情事受廷杖偉業具橐
饋遣太學生涂仲吉入都訟冤有旨嚴詰主使幾不免
十三年晉中允諭德轉庶子擢少詹事甫兩月謝歸
國朝順治間總督馬國柱薦授秘書院侍講奉敕修孝
經衍義陞國子祭酒丁母憂不出築梅村於城南新莊
日與四方士友觴詠其間巋然爲風雅宗主十餘年卒
年六十三遺命葬鄧尉之石壁題曰詩人吳梅村之墓
爲文瑰偉宏富詩并包眾有尤長樂府取明季遺事以
五七言寫之淋漓頓挫悻惻動人世稱詩史祀鄉賢
王御字聖乘力崇正學憤流寇披猖深慕王守仁爲人

王癸志稿

列傳

六十二

思廓清世難與陸世儀王發祥諸人講求兵法天文地
輿阨塞無不精究由選貢中崇禎九年舉人十二年會
試副榜 國朝順治十二年就選得宿松教諭移六安
學正所至整葺學宮誨迪士子遷房山知縣以簡靜慈
愛爲政革除規例不名一錢邑有盜殺人親率兵獲其
魁告歸年已耄矣好學不衰世儀謂其超悟似陳白沙
年九十三卒學者私諡敬一先生祀鄉賢

張王治字無近幼從兄溥學弱冠貢人太學順治四年
成進士授桐廬知縣縣故無城郭編戶凋殘王治悉心
招徠漸歸故業地當閩衝更調繹騷舟師過縣索挽夫

不足兵將譁王治公服曳舟以從督師者動色戒無犯於是襁負者日益至戶口得充實上官交薦擢工科給事中遂疏論東南漕兌之害請設官收官兌法兼以五米五銀刊爲定例又請開濬三江及江南分置藩臬並見施行其他論列皆切時要一二年中疏七十餘上江南通賊案起多所株連王治引例陳乞保全甚眾卒以峭直爲眾所忌落職家居十八年卒

王發祥字登喜父日新見隱逸傳發祥弱冠有文名明崇禎九年舉人與陸世儀陳瑚諸人講明理學 國朝順治十二年成進士除刑部廣西司主事轉員外時

壬癸志稿

列傳

六十四

上慎選學臣臨軒親試取發祥第一奉 命視學湖北詳列規條董率士子尤以表揚忠孝貞節爲急各邑志乘多經論定又刊全楚詩文一時人文興起巡按李廷松首列薦剡十七年兼攝湖南學政甄拔得人以事牽連解任尋還原職赴都候補卒年五十三妻吳氏繼妻陸氏子曾武吉武女慧瑩芳俱有傳

黃與堅字庭表幼從呂雲孚學以拔貢入成均廷試第一順治十六年成進士授推官旋以奏銷罣誤康熙十七年舉博學鴻詞試授翰林編修擢贊善典貴州鄉試時睢州湯斌以禮部尚書掌詹事有輔導 皇太子之

命 上難其副大臣羣推與堅遂以原銜充講官既有
忌斌者嗾廷臣交章劾與堅獨不署名以葬親乞歸
與堅學本經史詩文俱克名家海內稱之嘗輯太倉州
志未及梓行年八十三卒

王揆字藻儒錫爵曾孫時敏第八子康熙九年進士改
庶吉士授編修遷贊善提學浙江校刊劉宗周全集立
六賢講院修三江口黃尊素祠期滿歷講讀累陞內閣
學士轉戶部侍郎充經筵講官調吏部四十二年陞刑
部尚書尋調工部轉兵部禮部在刑部時往例錄囚止
錄清書口供漢司官不能通曉揆請兼錄漢稿著爲令

王癸志稿

列傳

六十五

又疏爭香山知縣張令憲死事之宜蔭紉御史陳惟孜
散遣太學諸生之非體皆總持綱紀務存大體及爲大
學士益恪謹五十六年冬會有御史八人以建儲請
上下其疏并出揆五月間摺外廷始知揆已先之矣六
十年春復具疏力申前請同時請者又有御史十二人
上疑出揆意乃 嚴旨切責 命揆子奕清代往西
陲效力時揆未解閣務以待罪不視事明年春仍 命
入閣任遇如故 世宗卽位揆以衰病請告 温旨畱
京備顧問越六年卒年八十四乾隆初年奕清還京爲
父請卹奉 旨王揆身居政府爲國本起見亦屬分所

當言予祭葬子奕清奕鴻奕清字幼芬康熙三十年進士授庶吉士歷官詹事府詹事屢主文衡凡朝廷編纂校讐之役多與焉六十年春 命代父赴烏里雅蘇臺軍效力雍正四年再 命在阿爾泰坐臺例應出貲贍蒙古人盡出家產以給乾隆元年 召還都仍以詹事管少詹事二年請父卹典給假營葬不及就道卒年七十三奕鴻字樹先康熙四十八年進士授戶部主事歷陞員外郎中典四川鄉試出爲湖南驛鹽糧儲道兄奕清有代父前往北路之 命奕鴻斥其產捐軍需銀五萬兩請送軍前奉 旨著往烏里雅蘇臺效力乾隆元

壬癸志稿

列傳

六十六

年 恩命還朝發四川以道用補川東巡道尋歸家居十五年卒年八十二

王原祁字茂京揆子康熙九年進士觀政吏部充順天鄉試同考官改授任縣知縣任故大陸爲九河下流時大潦部使者按視原祁力請弛賦奏減歲賦三千餘兩在任四年尚書魏象樞巡察畿南凡大案必委鞫焉尋行取擢刑科給事中轉禮科 特旨改中允入直南書房歷侍講侍讀學士充日講官累陞詹事府詹事掌院學士陞戶部左侍郎會豫省災折徵漕米原祁力請分年買補又 上諭直省錢糧三年輪蠲一周舊欠並與

豁除江南以奏銷稍後不入蠲數原祁獨請如 詔旨
不以桑梓引嫌五十四年以疾卒於官予祭葬祀鄉賢
原祁遇物坦易 上嘗稱其存心莫及素工詩文尤精
畫法官學士時常召入便殿從容濡染悉稱 旨畫苑
中奉爲神品

錢晉錫字方來以選貢人太學考教習第一謁選得富
陽知縣時閩逆初平滿漢兵道富陽者船夫供頓調治
得宜民不知擾復請蠲正賦興水利除磽瘠省差恤民
善政悉舉以薦擢禮科給事中疏兩廣鼓鑄之弊及浙
省造船之累論止鹽筴增引悉見施行陞通政使參議
壬癸志稿

列傳

六十七

轉督捕理事官痛抑投旗陷主之僕歷右通政遷太僕
寺卿尋爲順天府尹裁抑豪蠹畿甸肅清立金魚池義
學
聖祖爲親書廣育羣才匾額復疏請廣順天解額會山
左饑流民走集京師晉錫煮糜日食數千人醫藥殮埋
無算又設舟車津遣之費自冬徂春日與饑民接感疾
卒於官祀鄉賢

錢三錫字宸安康熙十五年進士授羅池知縣邑多姦
民潛結洞獠爲害三錫以計擒巨魁戮之遂讐服終其
任無譁釅者繕學舍集士子親爲講授人始知學二十

三年充同考官以治行擢江西道監察御史巡視東西城掌江南浙江道事皆稱職累陞太常寺少卿主廣東鄉試歷大理寺左右卿明法不阿多所平反陞光祿及太常卿宗人府丞晉都察院左副都御史旋陞戶部右侍郎轉左嚴覈積弊姦吏患之搆讐連染未卽白會將對簿三錫慨然引大臣不辱之義遂自縊事亦尋解

沈受宏字台臣歲貢生年十二能制舉義十四能詩已而受業於盛敬研極性命學乃大進吳偉業奇其才引爲弟子授以詩法名日起同里王揆及長洲繆彤俱以詩文相師友家貧父母俱失明受宏奉養以孝聞撫弟王癸志稿

妹及孤姪恩義備至又爲宗會禮合食收族喪葬不用浮屠年七十八卒祀鄉賢子起元有傳

王暮字孝徵原祁子康熙三十五年與弟諤同領鄉薦後十年成進士改清書庶吉士授編修典河南鄉試丁艱服闋五十九年視學陝西雍正五年由洗馬洊陞少詹事出爲廣東布政使旋調直隸時州縣新舊交代於倉穀多所軫轄暮稔其弊使碾米交代以新易陳有司便焉兵餉舊例於次月領前月糧暮令按期支發十三年調任山西乾隆二年擢任廣東巡撫時瓊州一郡編徵稅銀多缺額地方拘於考成在地丁榔柯稅排門煙

戶等項均攤賠派暮徹底查清奏免四千餘兩以蘇民困又以郡懸海外官茲土者遇有死亡家口至不能歸暮請酌動存公銀兩給發路費五年緣事被劾落職命赴軍臺效力尋奉 旨釋歸十六年 南巡加三品職銜又三歲卒子述濬字雋驤雍正四年舉人和州州同有惠政會歲饑奉檄查賑勞勩致疾卒於賑所從子述獻幼撫於暮以州同效用北河陞祁州知州以勤敏稱

顧陳埒字玉停宏沛子康熙四十四年舉人以薦入湛凝齋纂修書成議敘授行人出使山東浙江監督通州

壬癸志稿

列傳

六十九

倉所至得大體雍正三年以目疾乞歸陳埒有絕學三字學算學樂律俱精詣敦內行居喪不飲酒食肉不處內學宗陸九淵鋒棱諤諤纂修時總裁以文屬點定一日盡駁其稿總裁怒擲地陳埒徐起拾之明日總裁悟卒從陳埒說監倉洗手從事官吏經紀不得恣侵牟里居非公不至官府畱心著述質疑問難者恆滿座乾隆元年詔起原官以親老不出時 詔舉博學鴻詞詹事王奕清薦之辭不赴年七十卒子文龍字元在乾隆十五年舉人詩古文辭並有家法

沈起元字子大受宏子年十二能詩古文辭康熙六十

年成進士改庶吉士雍正初澄汰部屬選庶吉士補之遂授吏部驗封司員外郎兼考功司事出爲福建知府初試福州隨授興化署臺灣所至除積弊革陋規捕宿盜懲訟師設立正音書院在閩三載政聲日上以平反定案忤按察使意被劾鐫級乾隆元年起授江西鹽驛道旋擢河南按察使晉直隸布政使內遷光祿寺卿十三年因公降級明年乞假歸起元性端慤遇事一本至誠而才識足以行之莆田縣有陳王二姓訐訟累年樹黨互毆巡撫按察使將各實重典起元廉其實獨坐首事者臺灣山猪毛社生番擾境眾議立界起元謂彼非

壬癸志稿

列傳

七十

奪地特如猛獸出山則噬人耳界何益請於山口設寨禁其出境遂甯中州潦歲饑起元議於本省不成災處招集授糧民以得生八年直隸旱總督議十一月開賑起元力爭得速賑所屬有妄稟賑戶不賑口者嚴斥之災民俱得實惠自少覃心理學謂學問須知行合一從五倫上做起時張伯行主朱子而斥陸王李紱主陸王而詆朱子起元不肯稍有附會又謂孔門弟子自顏曾外入門各異歸於聞道今但守定經書實實做人不必高言作聖晚益窮易理得其微奧撰周易孔義集說以十翼爲宗歷主鍾山樂源安定婁東四書院歸里後藉

館資自給詩宗盛唐文學歐曾書法顏魯公晚益蒼勁
及病謂醫曰吾自念平生學力惟檢點身心使明淨純
潔以還天地父母耳言訖而逝卒年七十九祀鄉賢子
祖望字聰彝歷官江都縣丞以練達稱

王玗字天游幼工詩文兼精勾股以太學生充算法館
修書與父旦復同中康熙五十三年順天舉人館書成
議敘授刑部主事巡視船廠由員外擢御史巡視西城
旋掌京畿道晉工科給事中轉刑科巡按山西以失察
墩臺廢址被謫再補工部員外充律呂正義纂修官轉
郎中提督窯廠管理街道事授臨江知府未任卒玗通

壬癸志稿

列傳

七十一

達治體多建白在廠一年工作以時匠役不能舞弊嘗
條對十事爲軍民永久利多如請行巡西城時錢價昂
甚請發戶工二部錢以平市價在刑科論直省刑具率
踰部式奏請畫一得 旨允行巡晉省入境知驛丞喂
養馬匹累民奏請悉歸州縣所至問民疾苦體卹吏隱
有聲臺垣中子學璧字繹古監生考取吏目練習吏事
終河間府通判

徐元潤字雲伯天資亮特自幼卽以詩鳴嘉慶十五年
舉人授宜川知縣宜川與山西接壤適趙城縣姦民滋
事元潤嚴飭守備俱井井事旣民得不擾旋丁母憂服

闕補城固最後補白水其地五門堰以渠水灌田四萬餘畝歲久弊滋連年訟不解至則悉清釐其弊費省而利益溥陝督林文忠則徐亟稱其賢欲論薦以病不果歷數縣每以文教興治公餘日與士相講論每行縣車前執詩文請質者甚眾有片長獎借無餘力士以此德之居數載卒於官年六十二祀白水城固洋縣宜川紫陽名宦元潤綜覈今古能厲風節詩初學元劉晚年才識閱達不名一家文超邁拔俗爲時推重

壬癸志稿

列傳

七十二

壬癸志稿二終